

## ॥ नवग्रहसूक्तम् ॥

आ स॒त्येन॒ रज॑सा॒ वर्त॑मानो नि॒वेश॑यन्न॒मृतं॑ म॒र्त्यं च॑ । हिर॒ण्यये॑न  
सवि॒ता रथे॑नाऽदे॒वो या॑ति॒ भुव॑ना वि॒पश्यन्॑ । अ॒ग्निं दू॑तं वृ॒णीमहे॑  
होता॑रं वि॒श्ववै॑दसम् । अ॒स्य य॒ज्ञस्य॑ सु॒क्रतु॑म् ॥ येषा॒मीशे॑ पशु॒पतिः॑  
पशू॑नां चतु॑ष्पदामु॒त च॑ द्वि॒पदा॑म् । निष्क्री॑तोऽयं य॒ज्ञियं॑ भा॒गमे॑तु  
रा॒यस्पोषा॑ यज॑मानस्य सन्तु ॥

अधिदे॒वता प्र॒त्यधि॑दे॒वता स॑हिताय आदि॒त्याय॒ नमः॑ ॥ १ ॥

अ॒ग्निर्मूर्धा॑ दि॒वः क॒कुत्प॑तिः पृथि॒व्या अ॒यम् । अ॒पा२ रेता॑सि  
जिन्व॑ति । स्यो॒ना पृ॑थिवि॒ भवा॑ऽनृ॒क्षरा॑ नि॒वेश॑नी । यच्छा॑नः शर्म  
स॒प्रथाः॑ । क्षेत्र॑स्य पति॑ना व॒य२ हि॒ते नै॒व ज॑यामसि । गा॒मश्च॑  
पोष॑यित्वा स नो॑ मृडाती॒दृशे॑ ॥

अधिदे॒वता प्र॒त्यधि॑दे॒वता स॑हिताय अ॒ङ्गार॑काय॒ नमः॑ ॥ २ ॥

प्र वः॑ शु॒क्राय॑ भा॒नवे॑ भर॒ध्व२ ह॒व्यं म॒तिं चा॒ग्नये॑ सु॒पूत॑म् ॥  
यो दै॒व्यानि॑ मा॒नुषा॑ ज॒नू२ष्यन्त॑र्वि॒श्वानि॑ वि॒द्वना॑ जिगा॑ति ॥  
इन्द्रा॑णीमा॒सु ना॑रि॒षु सु॒पत्नी॑म॒हम॑श्रवम् । न ह्य॑स्या अ॒पर॑ञ्चन  
ज॒रसा॑ मर॑ते पतिः ॥ इन्द्र॑ वो वि॒श्वत॑स्प॒रि हवा॑महे जने॑भ्यः ।  
अ॒स्माक॑मस्तु के॒वलः॑ ॥

अधिदे॒वता प्र॒त्यधि॑दे॒वता स॑हिताय शु॒क्राय॒ नमः॑ ॥ ३ ॥

आप्या॑यस्व॒ समे॑तु ते वि॒श्वतः॑ सोम॒ वृष्णि॑यम् । भवा॒ वाज॑स्य

सङ्गथे॥ अ॒प्सु मे॒ सोमो॑ अब्रवीदन्तर्वि॒श्वानि॑ भेष॒जा। अ॒ग्निं च॑  
वि॒श्वश॑म्भुव॒माप॑श्च वि॒श्वभे॑षजीः। गौरी मि॒माय॑ सलिलानि॒ तक्ष॑ती।  
एक॑पदी द्विपदी॒ सा चतु॑ष्पदी। अ॒ष्टाप॑दी॒ नव॑पदी॒ बभू॑वुषी॑।  
स॒हस्रा॑क्षरा पर॒मे व्यो॑मन्।

अधिदेवता प्रत्यधिदेवता सहिताय सोमाय नमः॥४॥

उद्धु॑ध्यस्वाग्ने॒ प्रति॑जागृह्येनमिष्टापूर्ते॒ स॒सृ॑जेथाम॒यं च॑। पुनः॑  
कृ॒ण्व॑स्त्वा॒ पित॑रं॒ युवा॑नम॒न्वाता॑सी॒त्वयि॑ तन्तु॒मेत॑म्॥ इ॒दं  
विष्णु॑र्विच॒क्रमे॑ त्रे॒धा नि॑दधे प॒दम्। समू॒ढम॑स्यपा॒सु सुरे॑॥ विष्णो॑  
र॒राट॑मसि॒ विष्णोः॑ पृ॒ष्ठम॑सि॒ विष्णोः॑ श्र॒त्रे॒स्थो विष्णोः॑ स्यूर॑सि॒  
विष्णो॑र्ध्रु॒वम॑सि॒ वैष्ण॑वम॑सि॒ विष्ण॑वे त्वा।

अधिदेवता प्रत्यधिदेवता सहिताय बुधाय नमः॥५॥

बृह॑स्पते॒ अति॒यद॒र्यो अ॒र्हा॑द्विमद्विभाति॒ क्रतु॑म॒ञ्जने॑षु। यद्दी॒दय॑च्छ॒वंस॑र्त॒-  
प्रजा॑त॒ तद॑स्मासु॒ द्रवि॑णं धेहि चि॒त्रम्॥ इन्द्र॑मरुत्व इ॒ह पा॑हि॒ सोमं॑  
यथा॑ शा॒र्या॒ते अपि॑बः सु॒तस्य॑। तव॑ प्रणी॑ती॒ तव॑ शूर॒शर्म॑न्नावि॒वास॑न्ति  
क॒वयः॑ सु॒य॒ज्ञाः॥ ब्रह्म॑ज॒ज्ञानं॑ प्रथ॒मं पु॒रस्ता॒द्वि॒सी॒मतः॑ सु॒रुचो॑ वेन  
आ॒वः। स॒बु॒ध्रिया॑ उप॒मा अ॑स्य वि॒ष्टाः स॒तश्च॑ योनि॒मस॑तश्च॒ विवः॑॥  
अधिदेवता प्रत्यधिदेवता सहिताय बृहस्पतये नमः॥६॥

शं नो॑ दे॒वीर॒भिष्ट॑य॒ आपो॑ भवन्तु पी॒तये॑। शंयो॒रभि॑स्रवन्तु  
नः॥ प्रजा॑पते॒ न त्व॑दे॒तान्य॒न्यो वि॒श्वा जा॑तानि॒ परि॑ता ब॒भूव॑।  
यत्का॑मास्ते जुहुमस्तन्नो॑ अस्तु व॒यं स्या॑म॒ पत॑यो रयी॒णाम्।

इ॒मं य॑मप्र॒स्तर॑माहि॒ सी॒दाऽङ्गि॑रोभिः पि॒तृभिः॑ संवि॒दानः॑। आ॒त्वा  
म॒न्त्राः क॑वि॒श॒स्ता व॑हन्त्वे॒ना रा॑जन् ह॒विषा॑ मादयस्व॥

अधि॑दे॒वता प्र॑त्यधि॑दे॒वता स॑हि॒ताय॑ शनैश्च॒राय॑ नमः॥७॥

क॒या न॑श्चि॒त्र आ॑भु॒वदू॑ती स॒दावृ॑धः स॒खा। क॒या श॑चि॒ष्ठया॑ वृ॒ता।  
आ॒ऽय॒ङ्गौः पृ॒श्नि॒र॒क्र॒मी॒द॒स॒न॒न्मा॒तरं॑ पुनः। पि॒तरं॑ च प्र॒यन्त्सु॑वः।

य॒त्ते दे॒वी नि॒रु॒ति॒रा॒ब॒ब॒न्ध॒ दामं॑ ग्री॒वास्व॑वि॒च॒त्यम्। इ॒दं ते॒  
तद्वि॒ष्या॒म्यायु॑षो न म॒ध्या॒द॒थाजी॑वः पि॒तुम॑द्धि प्र॒मु॒क्तः॥

अधि॑दे॒वता प्र॑त्यधि॑दे॒वता स॑हि॒ताय॑ रा॒हवे॑ नमः॥८॥

के॒तुं कृ॑ण्वन्न॑के॒तवे॑ पे॒शो म॑र्या॒ अपे॑शसै। स॒मु॒ष॒द्भि॒रजा॑यथाः॥ ब्र॒ह्मा  
दे॒वानां॑ प॒द॒वीः क॑वी॒नामृ॑षि॒र्वि॒प्रा॑णां म॒हिषो॑ मृ॒गाणा॑म्। श्ये॒नो  
गृ॒ध्राणा॑ः स्व॒धि॒ति॒र्वना॑ना॒ सोमः॑ प॒वि॒त्रम॑त्येति॒ रेभ॑न्। (ऋक्)  
स॒चि॒त्र चि॒त्रं चि॒तय॑न् तम॒स्मे चि॒त्रक्ष॑त्र चि॒त्रत॑मं वयो॒धाम्। च॒न्द्रं  
र॒यिं पु॑रु॒वीरं॑ बृ॒हन्तं॑ च॒न्द्रच॑न्द्राभिर्गृ॒णते॑ यु॒वस्व॥

अधि॑दे॒वता प्र॑त्यधि॑दे॒वता स॑हि॒ताय॑ के॒तवे॑ नमः॥९॥

॥ॐ आ॒दि॒त्यादि॑ नवग्र॒हदे॒वता॑भ्यो नमो नमः॥

॥ॐ शा॒न्तिः शा॒न्तिः शा॒न्तिः॥